


Wöschwyber 2009



EM z Bärn, ei Fuer, eis Gschtungg, keis Tram, s wird gloffe,
Gholeiet, gjublet, gsunge, gröhlt u ganz viu gsoffe.
E Hollandfan isch o mi Hümpu, är isch nüm z kuriere.
Chum gseht dä orangsch, lüpft är ds Bei u tuet marggiere.

Är sig e Haube numme, si möge ne nid lide.
So guet wie klinisch tot, e Blinddarm zum Useschnide.
Das isch – i wott nid grüble, nei, s wär scho vermässe.
S geit mi nüt a u schliesslech – han is haut vergässe.

Wohäre mit dim Gäud? Alege wie die Riiche?
D Banke setze's grad i Sand, tüe nüt dergliiche.
Gib dis Gäud drum üs solide Schnitzubanke.
Was ou passiert, bi üs tuet ds Bankheimnis nid wanke.

By, by Stefan, by by Hügli, mir si so truurig.
Ou dass der Köbi Kuehn ewäg isch, wurmt üs schurig.
U das vom Sämi Schmid – nei, s macht üs geng wie suurer.
Dä überchunnt e Hung u mir dä Giftzwärg Ueli Murer.

I Beize, Hotäu, i de Heim u de Schpitäler
Chunnt der Läbesmitteler, dä Tierliquäler.
Im Ässe hets haut gliich no Chäfer, Pilzli, Made.
Reg di nid uf, die si ja prüeft u chöi nüm schade.

Die erschti Schtadtratsitzig hür im Rathaus unge
wei mir ga lose, hei mir Wyber gfunge.
O ne Bronco isch dert ghocket, das isch üs ufgfalle.
Eh, dä schützt üs dank vor dr Familie Wasserfalle.

Hesch Chummer, Sorge, hesch Problem? Muesch nid verzage.
Hesch kei Gäud, hesch Schulde, wott di d Inkassosteu
ychlage?
Wotsch wüsse, wie di useschnure, d Lüt chasch blände?
De chasch di vertrauensvou a Tschäpp@bern.ch wände.

E roti Ratteplag, wo d Schwiiz wott ruiniere.
Schwarzi Schaf, wo wiissi plage u schigganiere.
U gfürchigi Chräje, wo scharewiis d Schwiiz überfaue.
Jitz git's dä Freipass, ou für e Blocher u Co., dir chöit abhaue.

S wird geng wie änger im Lift, im Tram, unger de Laube.
Me schteit dicht a dicht, ke Platz wie früecher aube.
Im Krematorium wird's o äng, s macht nid grad heiter.
Jä gäll, was wotsch? Z Bärn wärde d Liche o geng breiter.

Ds Outo uf Pump, d'Schtüre nid zauht, d'Rächnige offe,
d' Möbu uf Rate, d'Glotze gleaset, dr Räscht versoffe.
Kredit ufnäh für ne Reis uf Bali mit em Kuoni.
Was d'UBS cha, chöi mir o. Wo si die Boni?

Für d Ching vom Obama git's e Hung zur Wahl vom Papi.
Für e Sämeli git's o eine, so ne schlappe Schlappi.
Für e Amstutz längt e chlyne Wadebiisser.
U dä vom Fuchs? Dä Schnuderhung het geng dr Schiisser.

Eis Gschtöhn u Bärz vo näbedra, i ma's nüm ghöre.
Wie die's tribel! Geit's nid liiser? S tuet mi schtöre.
I lüte Schturm, ir Tür dr Pfeuti. Was säge jetze?
Die beide tüe en Ikeachaschte zämesetze.

Schön isch dr Bahnhofplatz, so häu u rot u läbig.
Ou dä Baldachin macht Fröid, ungedüre geit's o gäbig.
Westside, inside, outside. Dr Bärepark wird o schpitze!
Oh du Liebeskind, was baue mir de jitze.

Ha nes Handy, e Mac, en iPod und e Laptop.
Bi geng erreichbar, schtändig online, chauf nur im
Internetshop.
Bi im Facebook, tue virtuell aues usprobiere.
Dasch hueregeil, jitz muess i mi nüm überau rasiere.

Ke Bank über e Tschäppät meh, dä söu i Rueh regiere.
Nüt meh vo Cüplipartys, das tuet nüm interessiere.
Dass är gärn suft, das sig nid wahr, das tät no fähle.
Üs schiisst's zwar a, wiu, wäge däm tüe mir ne wähle.

20 Minute, CH, News u Blick am Abe.
I Reih u Glied stöh die im Breitsch, am Hirschegrave.
Da letschti wott i eini näh, ha fröhlech pfiife,
Shit, uäh – jitz han i bigoscht ine Robidog ine griffe.

Jodulido, jodulido, joduliduli.
Jodulido, jodulido, jododuliduli.
Eifach gschtrickt, zwe links, zwe rächts u gli scho bisch de
Ganz z overscht obe uf dr Hitparadelischte.

